

四庫全書

集部

欽定四庫全書

集部

文章辨體彙選卷六百五

詳校官中書_臣李采

主事銜_臣徐以坤覆勘

總校官檢討_臣何思鈞

校對官中書_臣高 中

謄錄監生_臣葛 願錫

欽定四庫全書

文章辨體彙選卷六百二十一

明 賀復徵 編

書志六

地理志 漢班固

凡民通五常之性而其剛柔緩急音聲不同繫水土之風氣故謂之風好惡取舍動靜亡常隨君上之情欲故謂之俗孔子曰移風易俗莫善於樂言聖王在上統理

人倫必移其本而易其末此混同天下一之乎中和然
後王教成也漢承百王之末國土變改民人遷徙成帝
時劉向畧言其地分丞相張禹使屬潁川朱贛條其風
俗猶未宣究故輯而論之終其本末著於篇

秦地於天官東井輿鬼之分壑也於禹貢時跨雍梁二
州詩風兼秦豳兩國昔后稷封釐公劉處豳太王徙邠
文王作鄠武王治鎬其民有先王遺風好稼穡務本業
故豳詩言農桑衣食之本甚備有鄠杜竹林南山檀柘

號稱陸海為九州膏腴始皇之初鄭國穿渠引涇水溉
田沃野千里民以富饒漢興立都長安徙齊諸田楚昭
屈景及諸功臣家於長陵後世世徙吏二千石高訾富
人及豪桀并兼之家於諸陵蓋亦以彊幹弱支非獨為
奉山園也是故五方雜厝風俗不純其世家則好禮文
富人則商賈為利豪桀則游俠通姦瀕南山近夏陽多
阻險輕薄易為盜賊常為天下劇又郡國輻湊浮食者
多民去本就末列侯貴人車服僭上衆庶放效羞不相

及嫁娶尤崇侈靡送死過度天水隴西山多林木民以板為室屋及安定北地上郡西河皆迫近戎狄修習戰備高上氣力以射獵為先故秦詩曰在其板屋又曰王于興師修我甲兵與子偕行及車轡四載小戎之篇皆言車馬田狩之事漢興六郡良家子選給羽林期門以材力為官名將多出焉孔子曰君子有勇而亡誼則為亂小人有勇而亡誼則為盜故此數郡民俗質木不恥寇盜自武威以西本匈奴昆邪王休屠王地武帝時攘

之初置四郡以通西域隔絕南羌匈奴其民或以關東
下貧或以報怨過當或以諄逆亡道家屬徙焉習俗頗
殊地廣民稀水草宜畜牧故涼州之畜為天下饒保邊
塞二千石治之咸以兵馬為務酒醴之會上下通焉吏
民相親是以其俗風雨時節穀糴常賤少盜賊有和氣
之應賢於內郡此政寬厚吏不苛刻之所致也巴蜀廣
漢本南夷秦并以為郡土地肥美有江水沃野山林竹
木疏食果實之饒南賈滇楚僮西近邛笮馬旄牛民食

稻魚亡凶年憂俗不愁苦而輕易淫佚柔弱褊院景武
間文翁為蜀守教民讀書法令未能篤信道德反以好
文刺譏貴慕權勢及司馬相如游宦京師諸侯以文辭
顯於世鄉黨慕循其迹後有王褒嚴遵揚雄之徒文章
冠天下繇文翁倡其教相如為之師故孔子曰有教無
類武都地雜氐羌及犍為牂柯越巂皆西南外夷武帝
初開置民俗畧與巴蜀同而武都近天水俗頗似焉故
秦地天下三分之一而人衆不過什三然量其富居什

六秦幽吳札觀樂為之歌秦曰此之謂夏聲夫能夏則
大大之至也其周舊乎

魏地紫鵠參之分陲也河內本殷之舊都周既滅殷分
其畿內為三國詩風邶庸衛國是也邶呂封紂子武庚
庸管叔尹之衛蔡叔尹之以監殷民謂之三監故書序
曰武王崩三監畔周公誅之盡以其地封弟康叔號曰
孟侯以來輔周室遷邶庸之民于維維邑故邶庸衛三國
之詩相與同風邶詩曰在浚之下庸曰在浚之郊邶又

曰亦流于淇河水洋洋庸曰送我淇上在彼中河衛曰
瞻彼淇奧河水洋洋故吳公子札聘魯觀周樂聞邶庸
衛之歌曰美哉淵乎吾聞康叔之德如是是其衛風乎
至十六世懿公亡道為狄所滅齊桓公帥諸侯伐狄而
更封衛於河南曹楚丘是為文公而河內殷虛更屬於
晉康叔之風既歇而紂之化猶存故俗剛彊多豪桀侵
奪薄恩禮好生分河東土地平易有鹽鐵之饒本唐堯
所居詩風唐魏之國也其民有先王遺教君子深思小

人儉陋故唐詩蟋蟀山樞葛生之篇曰今我不樂日月
其邁宛其死矣它是媮百歲之後歸于其居皆思奢
儉之中念死生之慮吳札聞唐之歌曰思深哉其有陶
唐氏之遺民乎魏國亦姬姓也在晉之南河曲故其詩
曰彼汾一曲寘諸河之側吳札聞魏之歌曰美哉淵淵
乎以德輔此則明主也

周地柳七星張之分陴也昔周公營雒邑以為在于土
中諸侯蕃屏四方故立京師至幽王淫褒姒以滅宗周

子平王東居維邑初維邑與宗周通封畿東西長而南
北短短長相覆為千里至襄王以河內賜晉文公又為
諸侯所侵故其分墜小周人之失巧偽趨利貴財賤義
高富下貧憚為商賈不好仕宦

韓地角亢氐之分塹也詩風陳鄭之國與韓同星分焉
鄭本高辛氏火正祝融之虛也周宣王弟友為周司徒
食米於宗周畿內問於史伯曰王室多故何所可以逃
死史伯曰其濟洛河潁之間乎子男之國號會為大恃

勢與陰密侈貪冒君若寄帑與賄周亂而敝必將背君
君以成周之衆奉辭伐罪亡不克矣桓公從其言乃東
寄帑與賄虢會受之後三年幽王敗桓公死其子武公
與平王東遷卒定虢會之地右雒左滌食溱洧焉土陋
而險山居谷汲男女亟聚會故其俗淫鄭詩曰出其東
門有女如雲又曰溱與洧方濯濯兮士與女方秉菅兮
恂盱且樂惟士與女伊其相謔此其風也吳札聞鄭之
歌曰美哉其細已甚民弗堪也是其先亡乎陳本太昊

之虛周武王封舜後媯滿於陳是為胡公妻以元女大
姬婦人尊貴好祭祀用史巫故其俗巫鬼陳詩曰坎其
擊鼓宛丘之下亡冬亡夏值其鷺羽又曰東門之枌宛
丘之栩子仲之子婆娑其下此其風也吳札聞陳之歌
曰國亡主其能久乎潁川南陽本夏禹之國夏人上忠
其敝鄙朴秦既滅韓徙天下不軌之民於南陽故其俗
夸奢上氣力好商賈漁獵臧匿難制御也宛西通武關
東受江淮一都之會也宣帝時鄭弘召信臣為南陽太

守治皆見紀信臣勸民農桑去末歸本郡以殷富潁川
韓都士有申子韓非刻害餘烈高仕宦好文法民以貪
遘爭訟生分為失韓延壽為太守先之以敬讓黃霸繼
之教化大行獄或八年亡重罪囚南陽好商賈召父富
以本業潁川好爭訟分異黃韓化以篤厚君子之德風
也小人之德草也信矣

趙地昂畢之分塹也趙中山地薄人衆猶有沙丘紂淫
亂餘民丈夫相聚遊戲悲歌忼慨起則椎剽掘冢作姦

巧多弄物為倡優女子彈弦跕躑游媚富貴徧諸侯之
後宮邯鄲北通燕涿南有鄭衛漳河之間一都會也其
土廣俗雜大率精急高氣勢輕為姦太原上黨又多晉
公族子孫以詐力相傾矜夸功名報仇過直嫁取送死
奢靡漢興號為難治常擇嚴猛之將或任殺伐為威父
兄被誅子弟怨憤至告訐刺史二千石或報殺其親屬
鍾代石北迫近胡寇民俗慳忒好氣為姦不事農商
自金晉時已患其剽悍而武靈王又益厲之故冀州之

部盜賊常為它州劇定襄雲中五原本戎狄地頗有趙齊衛楚之徙其民鄙朴少禮文好射獵鴈門亦同俗

燕地尾箕分壑也南通齊趙勃碣之間一都會也初太子丹賓養勇士不愛後宮美女民化以為俗至今猶然賓客相過以婦侍宿嫁取之夕男女無別反以為榮後稍頗止然終未改其俗愚悍少慮輕薄無威亦有所長敢於急人燕丹遺風也上谷至遼東地廣民希數被胡寇俗與趙代相類有漁鹽棗栗之饒北隙烏丸夫餘東

賈真番之利玄菟樂浪武帝時置皆朝鮮濊貉句驪蠻夷殷道衰箕子去之朝鮮教其民以禮義田蠶織作樂浪朝鮮民犯禁八條相殺以當時償殺相傷以穀償相盜者男没入為其家奴女子為婢欲自贖者人五十萬雖免為民俗猶羞之嫁取無所讐是以其民終不相盜無門戶之閉婦人貞信不淫辟其田民飲食以籩豆都邑頗放效吏及內郡賈人往往以杯器食郡初取吏於遼東吏見民無閉臧及賈人往者夜則為盜俗稍益薄

今於犯禁寢多至六十餘條可貴哉仁賢之化也然東夷天性柔順異於三方之外故孔子悼道不行設浮於海欲居九夷有以也夫樂浪海中有倭人分為百餘國以歲時來獻見云

齊地虛危之分壑也少昊之世有爽鳩氏虞夏時有李塉湯時有逢公柏陵殷末有薄姑氏皆為諸侯國此地至周成王時薄姑氏與四國共作亂成王滅之以封師尚父是為太公詩風齊國是也臨畱名營丘故齊詩曰

子之營兮遭我虜虜之間兮又曰竢我於著乎而此亦其舒緩之體也吳札聞齊之歌曰泱泱乎大風也哉其太公乎國未可量也古有分土亡分民太公以齊地負海島鹵少五穀而人民寡迺勸以女工之業通魚鹽之利而人物輻湊後十五世桓公用管仲設輕重以富國合諸侯成伯功身在陪臣而取三歸故其俗彌侈織作水紉綺繡純麗之物號為冠帶衣履天下初太公治齊修道術尊賢智賞有功故至今其土多好經術矜功名

舒緩閭達而足智其失夸奢朋黨言與行繆虛詐不情
急之則離散緩之則放縱始桓公兄襄公淫亂姑姊妹
不嫁於是令國中民家長女不得嫁名曰巫兒為家主
祠嫁者不利其家民至今以為俗痛乎道民之道可不
慎哉昔太公始封周公問何以治齊太公曰舉賢而上
功周公曰後世必有篡殺之臣其後二十九世為彊臣
田和所滅而和自立為齊侯至孫威王稱王五世為秦
所滅臨淄海岱之間一都會也其中具五民云

魯地奎婁之分壘也周興以少昊之虛曲阜封周公子伯禽為魯侯以為周公主其民有聖人之教化故孔子曰齊一變至於魯魯一變至於道言近正也瀕洙泗之水其民涉度幼者扶老而代其任俗既益薄長老不自安與幼少相讓故曰魯道衰洙泗之間斷斷如也孔子閔王道將廢迺修六經以述唐虞三代之道弟子受業而通者七十有七人是以其民好學上禮義重廉恥周公始封太公問何以治魯周公曰尊尊而親親太公曰

後世寢弱矣故魯自文公以後祿去公室政在大夫李氏逐昭公陵夷微弱三十四世而為楚所滅今去聖久遠周公遺化銷微孔氏庠序衰壞地陋民衆頗有桑麻之業亡林澤之饒俗儉嗇愛財趨商賈好訾毀多巧偽喪祭之禮文備實寡然其好學猶愈於它俗漢興以來魯東海多至卿相

宋地房心之分壑也周封微子於宋本陶唐氏火正閼伯之虛也濟陰定陶詩風曹國也武王封弟叔振鐸於

曹其後稍大得山陽陳留二十餘世為宋所滅昔堯作
游成陽舜漁雷澤湯止于亳故其民猶有先王遺風重
厚多君子好稼穡惡衣食以致畜臧宋自微子二十餘
世至景公滅曹滅曹後五世亦為齊楚魏所滅參分其
地魏得其梁陳留齊得其濟陰東平楚得其沛故今之
楚彭城本宋也春秋經曰圍宋彭城宋雖滅本大國故
自為分塹沛楚之失急疾顛已地薄民貧而山陽好為
姦盜

衛地營室東壁之分壑也衛本國既為狄所滅文公徙
楚丘三十餘年子成公徙於帝丘故春秋經曰衛遷于
帝丘今之濮陽是也本顓頊之虛故謂之帝丘夏后之
世昆吾氏居之成公後十餘世為韓魏所侵盡亡其旁
邑獨有濮陽後秦滅濮陽置東郡徙之於野王始皇既
并天下猶獨置衛君二世時乃廢為庶人凡四十世九
百年最後絕故獨為分壑衛地有桑間濮上之阻男女
亦亟聚會聲色生焉故俗稱鄭衛之音周末有子路夏

育民人慕之故其俗剛武上氣力漢興二千石治者亦
以殺戮為威宣帝時韓延壽為東郡太守承聖恩崇禮
義尊諫爭至今東郡號善為吏延壽之化也其失頗奢
靡嫁取送死過度而野王好氣任俠有濮上風

楚地翼軫之分壘也周成王時封文武先師鬻熊之曾
孫熊繹於荊蠻為楚子居丹陽後十餘世至熊達是為
武王寢以強大後五世至嚴王總帥諸侯觀兵周室并
吞江漢之間內滅陳魯之國後十餘世頃襄王東徙於

陳楚有江漢川澤山林之饒江南地廣或火耕水耨民
食魚稻以漁獵山伐為業果蔬蠃蛤食物常足故嵒窳
媮生而亡積聚飲食還給不憂凍餓亦亡千金之家信
巫鬼重淫祀而漢中淫失枝柱與巴蜀同俗汝南之別
皆急疾有氣勢江陵故郢都西通巫巴東有雲夢之饒
亦一都會也

吳地斗分壁也太伯初奔荆蠻荆蠻歸之號曰句吳太
伯卒仲雍立至曾孫周章而武王克殷因而封之又封

周章弟中於河北是為北吳後世謂之虞十二世為晉
所滅後二世而荆蠻之吳子壽夢盛大稱王其少子則
季札有賢材兄弟欲傳國札讓而不受自太伯壽夢稱
王六世闔廬舉伍子胥孫武為將戰勝攻取興霸名於
諸侯至子夫差誅子胥用宰嚭為粵王句踐所滅吳粵
之君皆好勇故其民至今好用劍輕死易發粵既并吳
後六世為楚所滅後秦又擊楚徙壽春至子為秦所滅
壽春合肥受南北湖皮革鮑木之輸亦一都會也始楚

賢臣屈原被讒放流作離騷諸賦以自傷悼後有宋玉
唐勒之屬慕而述之皆以顯名漢興高祖王兄子濞於
吳招致天下之娛游子弟枚乘鄒陽嚴夫子之徒興於
文景之際而淮南王安亦都壽春招賓客著書而吳有
嚴助朱買臣貴顯漢朝文辭並發故世傳楚辭其失巧
而少信初淮南王異國中民家有女者以待游士而妻
之故至今多女而少男本吳粵與楚接比數相并兼故
民俗畧同吳東有海鹽章山之銅三江五湖之利亦江

東之一都會也豫章出黃金然董董物之所有取之不足以更費江南卑濕丈夫多大會稽海外有東鯤人分為二十餘國以歲時來獻見云

粵地牽牛婺女之分壘也其君禹後帝少康之庶子云封於會稽文身斷髮以避蛟龍之害後二十世至句踐稱王用范蠡大夫種計滅吳度淮與齊晉諸侯會致貢於周周元王使使賜命為伯諸侯畢賀後五世為楚所滅子孫分散君服於楚後十世至閼君搖佐諸侯平秦

漢興復立搖為越王是時秦南海尉趙佗亦自王傳國
至武帝時盡滅以為郡云處近海多犀象毒冒珠璣銀
銅果布之湊中國往商賈者多取富焉番禺其一都會
也自合浦徐聞南入海得大州東西南北方千里武帝
元封元年畧以為儋耳珠厓郡民皆服布如單被穿中
央為貫頭男子耕農種木稻紵麻女子桑蠶織績亡馬
與虎民有五畜山多麋麋兵則矛盾刀木弓弩竹矢或
骨為鏃自初為郡縣吏卒中國人多侵陵之故率數歲

壹反元帝時遂罷棄之自日南障塞徐聞合浦船行可
五月有都元國又船行可四月有邑盧沒國又船行可
二十餘日有諶離國步行可十餘日有夫甘都盧國船
行可二月餘有黃支國民俗畧與珠厓相類其州廣大
戶口多多異物自武帝以來皆獻見有譯長屬黃門與
應募者俱入海市明珠璧流離奇石異物齎黃金雜繒
而往所至國皆稟食為耦蠻夷賈船轉送致之亦利交
易剽殺人又苦逢風波溺死不者數年來還大珠至圍

二寸以下平帝元始中王莽輔政欲耀威德厚遺黃支
王令遣使獻生犀牛自黃支船行可八月到皮宗船行
可二月到日南象林界云黃支之南有已程不國漢之
譯使自此還矣

藝文志

班固

昔仲尼沒而微言絕七十子喪而大義乖故春秋分為
五詩分為四易有數家之傳戰國從衡真偽分爭諸子
之言紛然散亂至秦患之乃燔滅文章以愚黔首漢興

改秦之敗大收篇籍廣開獻書之路迄孝武世書缺簡
脫禮壞樂崩聖上喟然而稱曰朕甚閔焉於是建臧書
之策置寫書之官下及諸子傳說皆充秘府至成帝時
以書頗散亡使謁者陳農求遺書於天下詔光祿大夫
劉向校經傳諸子詩賦步兵校尉任宏校兵書太史令
尹咸校數術侍醫李柱國校方技每一書已向輒條其
篇目撮其指意錄而奏之會向卒哀帝復使向子侍中
奉車都尉歆卒父業歆於是總羣書而奏其七畧故有

輯畧有六藝畧有諸子畧有詩賦畧有兵書畧有術數畧有方技畧今刪其要以備篇籍

易曰宓戲氏仰觀象於天俯觀法於地觀鳥獸之文與地之宜近取諸身遠取諸物於是始作八卦以通神明之德以類萬物之情至於殷周之際紂在上位逆天暴物文王以諸侯順命而行道天人之占可得而効於是重易六爻作上下篇孔氏為之彖象繫辭文言序卦之屬十篇故曰易道深矣人更三聖世歷三古及秦燔書

而易為筮卜之事傳者不絕漢興田何傳之訖於宣元
有施孟梁丘京氏列於學官而民間有費高二家之說
劉向以中古文易經校施孟梁丘經或脫去无咎悔亡
唯費氏經與古文同易曰河出圖雒出書聖人則之故
書之所起遠矣至孔子纂焉上斷於堯下訖於秦凡百
篇而為之序言其作意秦燔書禁學濟南伏生獨壁臧
之漢興亡失求得二十九篇以教齊魯之間訖孝宣世
有歐陽大小夏侯氏立於學官古文尚書者出孔子壁

中武帝末魯共王壞孔子宅欲以廣其宮而得古文尚書及禮記論語孝經凡數十篇皆古字也共王往入其宅聞鼓琴瑟鐘磬之音於是懼乃止不壞孔安國者孔子後也悉得其書以考二十九篇得多十六篇安國獻之遭巫蠱事未列于學官劉向以中古文校歐陽大小夏侯三家經文酒誥脫簡一召誥脫簡二率簡二十五字者脫亦二十五字簡二十二字者脫亦二十二字文字異者七百有餘脫字數十書者古之號令號令於衆

其言不立具則聽受施行者弗曉古文讀應爾雅故解古今語而可知也書曰詩言志歌詠言故哀樂之心感而歌詠之聲發誦其言謂之詩詠其聲謂之歌故古有采詩之官王者所以觀風俗知得失自考正也孔子純取周詩上采殷下取魯凡三百五篇遭秦而全者以其諷誦不獨在竹帛故也漢興魯申公為詩訓故而齊轅固燕韓生皆為之傳或取春秋采雜說咸非其本義與不得已魯最為近之三家皆列於學官又有毛公之學

自謂子夏所傳而河間獻王好之未得立易曰有夫婦
父子君臣上下禮義有所錯而帝王質文世有損益至
周曲為之防事為之制故曰禮經三百威儀三千及周
之衰諸侯將踰法度惡其害已皆滅去其籍自孔子時
而不具至秦大壞漢興魯高堂生傳士禮十七篇訖孝
宣世后倉最明戴德戴聖慶普皆其弟子三家立於學
官禮古經者出於魯淹中及孔氏學七十篇文相似多
三十九篇及明堂陰陽王史氏記所見多天子諸侯卿

大夫之制雖不能備猶瘡倉等推士禮而致於天子之說易曰先王作樂崇德殷薦之上帝以享祖考故自黃帝下至三代樂各有名孔子曰安上治民莫善於禮移風易俗莫善於樂二者相與並行周衰俱壞樂尤微眇以音律為節又為鄭衛所亂故無遺法漢興制氏以雅樂聲律世在樂官頗能紀其鏗鏘鼓舞而不能言其義六國之君魏文侯最為好古孝文時得其樂人竇公獻其書乃周官大宗伯之大司樂章也武帝時河間獻王

好儒與毛生等共采周官及諸子言樂事者以作樂記
獻八佾之舞與制氏不相遠其內史丞王定傳之以授
常山王禹禹成帝時為謁者數言其義獻二十四卷記
劉向校書得樂記二十三篇與禹不同其道寔以益微
古之王者世有史官君舉必書所以慎言行昭法式也
左史記言右史記事事為春秋言為尚書帝王靡不同
之周室既微載籍殘缺仲尼思存前聖之業乃稱曰夏
禮吾能言之杞不足徵也殷禮吾能言之宋不足徵也

文獻不足故也足則吾能徵之矣以魯周公之國禮文
備物史官有法故與左丘明觀其史記據行事仍人道
因興以立功就敗以成罰假日月以定歷數藉朝聘以
正禮樂有所褒諱貶損不可書見口授弟子弟子退而
異言丘明恐弟子各安其意以失其真故論本事而作
傳明夫子不以空言說經也春秋所貶損大人當世君
臣有威權勢力其事實皆形於傳是以隱其書而不宣
所以免時難也及末世口說流行故有公羊穀梁鄒夾

之傳四家之中公羊穀梁立於學官鄒氏無師夾氏未
有書論語者孔子應答弟子時人及弟子相與言而接
聞於夫子之語也當時弟子各有所記夫子既卒門人
相與輯而論纂故謂之論語漢興有齊魯之說傳齊論
者昌邑中尉王吉少府宋畸御史大夫貢禹尚書令五
鹿充宗膠東庸生唯王陽名家傳魯論語者常山都尉
龔奮長信少府夏侯勝丞相韋賢魯扶卿前將軍蕭望
之安昌侯張禹皆名家張氏最後而行於世孝經者孔

子為曾子陳孝道也夫孝天之經地之義民之行也舉
大者言故曰孝經漢興長孫氏博士江翁少府后倉諫
大夫翼奉安昌侯張禹傳之各自名家經文皆同唯孔
氏壁中古文為異父母生之續莫大焉故親生之膝下
諸家說不安處古文字讀皆異易曰上古結繩以治後
世聖人易之以書契百官以治萬民以察蓋取諸大天
揚于王庭言其宣揚於王者朝廷其用最大也古者八
歲入小學故周官保氏掌養國子教之六書謂象形象

事象意象聲轉注假借造字之本也漢興蕭何草律亦著其法曰太史試學童能諷書九千字以上乃得為史又以六體試之課最者以為尚書御史史書令史吏民上書字或不正輒舉劾六體者古文奇字篆書隸書繆篆蟲書皆所以通知古今文字摹印章書幡信也古制書必同文不知則闕問諸故老至於衰世是非無正人用其私故孔子曰吾猶及史之闕文也今亡矣夫蓋傷其寔不正史籀篇者周時史官教學童書也與孔氏壁

中古文異體蒼頡七章者秦丞相李斯所作也爰歷六章者車府令趙高所作也博學七章者太史令胡毋敬所作也文字多取史籀篇而篆體復頗異所謂秦篆者也是時始造隸書矣起於官獄多事苟趨省易施之於徒隸也漢興閭里書師合蒼頡爰歷博學三篇斷六十字以為一章凡五十五章并為蒼頡篇武帝時司馬相如作凡將篇無復字元帝時黃門令史游作急就篇成帝時將作大匠李長作元尚篇皆蒼頡中正字也凡將

則頗有出矣至元始中徵天下通小學者以百數各令
記字於庭中揚雄取其有用者以作訓纂篇順續蒼頡
又易蒼頡中重複之字凡八十九章臣復續揚雄作十
三章凡一百三章無復字六藝羣書所載畧備矣蒼頡
多古字俗師失其讀宣帝時徵齊人能正讀者張敞從
受之傳至外孫之子杜林為作訓故并列焉六藝之文
樂以和神仁之表也詩以正言義之用也禮以明體明
者著見故無訓也書以廣聽知之術也春秋以斷事信

之符也五者蓋五常之道相須而備而易為之原故曰
易不可見則乾坤或幾乎息矣言與天地為終始也至
於五學世有變改猶五行之更用事焉古之學者耕且
養三年而通一藝存其大體玩經文而已是故用日少
而畜德多三十而五經立也後世經傳既已乖離博學
者又不思多聞闕疑之義而務碎義逃難便辭巧說破
壞形體說五字之文至於二三萬言後進彌以馳逐故
幼童而守一藝白首而後能言安其所習毀所不見終

以自蔽此學者之大患也序六藝為九種

儒家者流蓋出於司徒之官助人君順陰陽明教化者也游文於六經之中留意於仁義之際祖述堯舜憲章文武宗師仲尼以重其言於道最為高孔子曰如有所譽其有所試唐虞之際殷周之盛仲尼之業已試之效者也然惑者既失精微而辟者又隨時抑揚違離道本苟以譁衆取寵後進循之是以五經乖析儒學寔衰此辟儒之患道家者流蓋出於史官歷記成敗存亡禍福

古今之道然後知秉要執本清虛以自守卑弱以自持
此君人南面之術也合於堯之克讓易之謙謙一謙而
四益此其所長也及放者為之則欲絕去禮學兼棄仁
義曰獨任清虛可以為治陰陽家者流蓋出於義和之
官敬順昊天厯象日月星辰敬授民時此其所長也及
拘者為之則牽於禁忌泥於小數舍人事而任鬼神法
家者流蓋出於理官信賞必罰以輔禮制易曰先王以
明罰飭法此其所長也及刻者為之則無教化去仁愛

專任刑法而欲以致治至於殘害至親傷恩薄厚名家者流蓋出於禮官古者名位不同禮亦異數孔子曰必也正名乎名不正則言不順言不順則事不成此其所長也及警者為之則苟鉤鈇析亂而已墨家者流蓋出於清廟之守茅屋采椽是以貴儉養三老五更是以兼愛選士大射是以上賢宗祀嚴父是以右鬼順四時而行是以非命以孝視天下是以上同此其所長也及蔽者為之見儉之利因以非禮推兼愛之意而不知別親

疏從橫家者流蓋出於行人之官孔子曰誦詩三百使
於四方不能專對雖多亦奚以為又曰使乎使乎言其
當權事制宜受命而不受辭此其所長也及邪人為之
則上詐諛而棄其信雜家者流蓋出於議官兼儒墨
合名法知國體之有此見王治之無不貫此其所長也
及盪者為之則漫羨而無所歸心農家者流蓋出於農
稷之官播百穀勸耕桑以足衣食故八政一曰食二曰
貨孔子曰所重民食此其所長也及鄙者為之以為無

所事聖王欲使君臣並耕諄上下之序小說家者流蓋
出於裨官街談巷語道聽塗說者之所造也孔子曰雖
小道必有可觀者焉致遠恐泥是以君子弗為也然亦
弗滅也閭里小知者之所及亦使綴而不忘如或一言
可采此亦芻蕘狂夫之議也諸子十家其可觀者九家
而已皆起於王道既微諸侯力政時君世主好惡殊方
是以九家之術蠡出並作各引一端崇其所善以此馳
說取合諸侯其言雖殊辟猶水火相滅亦相生也仁之

與義敬之與和相反而皆相成也易曰天下同歸而殊塗一致而百慮今異家者各推所長窮知究慮以明其指雖有蔽短合其要歸亦六經之支與流裔使其人遭明王聖主得其所折中皆股肱之材已仲尼有言禮失而求諸野方今去聖久遠道術缺廢無所更索彼九家者不猶瘡於野乎若能修六藝之術而觀此九家之言舍短取長則可以通萬方之畧矣

傳曰不歌而誦謂之賦登高能賦可以為大夫言感物

造端材知深美可與圖事故可以為列大夫也古者諸侯卿大夫交接鄰國以微言相感當揖讓之時必稱詩以諭其志蓋以別賢不肖而觀盛衰焉故孔子曰不學詩無以言也春秋之後周道寢壞聘問歌詠不行於列國學詩之士逸在布衣而賢人失志之賦作矣大儒孫卿及楚臣屈原離讒憂國皆作賦以風咸有惻隱古詩之義其後宋玉唐勒漢興枚乘司馬相如下及揚子雲競為侈麗閎衍之詞沒其風諭之義是以揚子悔之曰

詩人之賦麗以則辭人之賦麗以淫如孔氏之門人用
賦也則賈誼登堂相如入室矣如其不用何自孝武立
樂府而采歌謠於是有代趙之謳秦楚之風皆感於哀
樂緣事而發亦可以觀風俗知薄厚云序詩賦為五種
權謀者以正守國以竒用兵先計而後戰兼形勢包陰
陽用技巧者也形執者雷動風舉後發而先至離合背
鄉變化無常以輕疾制敵者也陰陽者順時而發推刑
德隨斗擊因五勝假鬼神而為助者也技巧者習手足

便器械積機關以立攻守之勝者也兵家者蓋出古司馬之職王官之武備也洪範八政八曰師孔子曰為國者足食足兵以不教民戰是謂棄之明兵之重也易曰古者弦木為弧剡木為矢弧矢之利以威天下其用上矣後世燿金為刃割革為甲器械甚備下及湯武受命以師克亂而濟百姓動之以仁義行之以禮讓司馬法是其遺事也自春秋至於戰國出奇設伏變詐之兵並作漢興張良韓信序次兵法凡百八十二家刪取要用

定著三十五家諸呂用事而盜取之武帝時軍政楊僕
摺撫遺逸紀奏兵錄猶未能備至於孝成命任宏論次
兵書為四種

天文者序二十八宿步五星日月以紀吉凶之象聖王
所以參政也易曰觀乎天文以察時變然星事舛悞非
湛密者弗能由也夫觀景以謹形非明王亦不能服聽
也以不能由之臣諫不能聽之主此所以兩有患也歷
譜者序四時之位正分至之節會日月五星之辰以考

寒暑殺生之實故聖王必正厯數以定三統服色之制
又以探知五星日月之會凶阨之患吉隆之喜其術皆
出焉此聖人知命之術也非天下之至材其孰與焉道
之亂也患出於小人而強欲知天道者壞大以為小削
遠以為近是以道術破碎而難知也五行者五常之形
氣也書云初一日五行次二曰羞用五事言進用五事
以順五行也貌言視聽思心失而五行之序亂五星之
變作皆出於律厯之數而分為一者也其法亦起五德

終始推其極則無不至而小數家因此以為吉凶而行
於世寔以相亂著龜者聖人之所用也書曰女則有大
疑謀及卜筮易曰定天下之吉凶成天下之亹亹者莫
善於著龜是故君子將有為也將有行也問焉而以言其
受命也如嚮無有遠近幽深遂知來物非天下之至精
其孰能與於此及至衰世解於齊戒而婁煩卜筮神明
不應故筮瀆不告易以為忌龜厭不告詩以為刺雜占
者紀百事之象候善惡之徵易曰占事知來衆占非一


而夢為大故周有其官而詩載熊羆虺蛇衆魚旐旗之
夢著明大人之占以考吉凶蓋參卜筮春秋之說詖也
曰人之所忌其氣災以取之詖由人興也人失常則詖
興人無釁焉詖不自作故曰德勝不祥義厭不惠桑穀
其生太戊以興雉雉登鼎武丁為宗然惑者不稽諸躬
而忌詖之見是以詩刺召彼故老訊之占夢傷其舍本
而憂末不能勝凶咎也形法者大舉九州之執以立城
郭室舍形人及六畜骨法之度數器物之形容以求其

聲氣貴賤吉凶猶律有長短而各徵其聲非有鬼神數自然也然形與氣相首尾亦有有其形而無其氣有其氣而無其形此精微之獨異也數術者皆明堂羲和史卜之職也史官之廢久矣其書既不能具雖有其書而無其人易曰苟非其人道不虛行春秋時魯有梓慎鄭有裨竈晉有卜偃宋有子韋六國時楚有甘公魏有石申夫漢有唐都庶得麤猶蓋有因而成易無因而成難故因舊書以序數術為六種

醫經者原人血脉經絡骨髓陰陽表裏以起百病之本
死生之分而用度歲石湯火所施調百藥齊和之所宜
至齊之得猶慈石取鐵以物相使拙者失理以瘡為劇
以生為死經方者本草石之寒溫量疾病之淺深假藥
味之滋因氣感之宜辨五苦六辛致水火之齊以通閉
解結反之於平及失其宜者以熱益熱以寒增寒精氣
內傷不見於外是所獨失也故諺曰有病不治常得中
醫房中者情性之極至道之際是以聖王制外樂以禁

內情而為之節文傳曰先王之作樂所以節百事也樂而有節則和平壽考及迷者弗顧以生疾而隕性命神僊者所以保性命之真而游求於其外者也聊以盪意平心同死生之域而無怵惕於胸中然而或者專以為務則誕欺怪迂之文彌以益多非聖王之所以教也孔子曰索隱行怪後世有述焉吾不為之矣方技者皆生之具王官之一守也大古有岐伯俞拊中世有扁鵲秦和蓋論病以及國原診以知政漢興有倉公今其技

術晦昧故論其書以序方技為四種



文章辨體彙選卷六百二十一

欽定四庫全書

集部

文章辨體彙選卷六百二十四

五

詳校官中書_臣李采

主事銜_臣徐以坤覆勘

總校官檢討_臣何思鈞

校對官中書_臣高中

謄錄監生_臣丁煒

欽定四庫全書

文章辨體彙選卷六首十二

明 賀復徵 編

志七

游名山志

宋謝靈運

夫衣食人生之所資山水性分之所適今滯所資之累壅其所適之性耳俗議多云歡足本在華堂枕品漱流者乏於大志故保其枯槁余謂不然君子有愛已之情有救

物之能橫流之弊非才不治故有屈己以濟彼豈以名利之場賢於清曠之域邪語萬乘則鼎湖有縱轡論儲貳則嵩山有絕控又陶朱高揖越相留侯願辭漢傳推此而言可以明矣

山栖志

梁劉峻

夫鳥居山上層巢木末魚潛淵下窟穴泥沙豈好異哉蓋性自然也故有忽白璧而樂垂綸負玉鼎而要卿相行藏紛糾顯晦踏駁無異火炎水流圓動方息斯則廟

堂之與江海蓬戶之與金閨並然其所然悅其所悅烏
足毛羽瘡痍於其間哉予生自原野善畏難狎心駭雲
臺朱屋望絕高蓋青組且霑濡霧露彌顧間逸每濯青
瀨息椒丘寤寐永懷其來尚矣蚓專噬壤民欲天縱爰
泊二毛得居巖穴所居為東陽郡金華山東陽實會稽
西部也是生竹箭山川秀麗臯澤坎鬱若其羣峰疊起
則接漢連霞喬木布護則春青冬綠迴溪映流則十仞
洞底膚寸雲合必千里雨散信卓犖壘壇神居與宅是

以帝鴻遊斯鑄鼎雨師寄此乘煙故澗勒赤松之名山
貽緡雲之號近代江治中奮迅泥滓王徵士高拔風塵
龍盤鳳栖咸萃茲地良由碧湍素石可致幽人者哉金
華山古馬鞍山也蘊靈藏聖列名仙謨左元放稱此山
云可免洪水五兵可合神丹九轉金華之首有紫巖山
山色紅紫因此為稱靡迤坡陀下屬深渚巔岼隱嶙上
虧日月登自山麓漸高漸峻壟路迫隘魚貫而升路側
有絕澗間間虜谿俯窺木杪焦原石色匪獨危懸至山

將半便有廣澤大川臯陸隱賑予之葺宇實在斯焉三
面皆迴山周繞有象乳郭前則平野蕭條目極通望東
西帶二澗四時飛流泉清瀾微霏滴瀝生響白波跳沫
涵涌成音並渭瀆通引交渠綺錯懸溜瀉於軒甍激湍
迴於堦砌供帳無綆汲盥漱息瓶盆楓櫨椅櫪之樹梓
栢桂樟之木分形異色千族萬種結朱實包綠裹杭白
蒂抽紫莖櫛蠹萃萼梢清風鳴衆籟垂條欄戶布葉房
櫳中谷澗濱華蘂攢列至于青春緩謝萍生泉動則有

都梁含馥懷香送芬長樂負霜宜男泣露芙蕖紅華照
水臯蘇縹葉從風憑軒永眺蠲憂忘疾丘阿陵曲衆藥
灌叢地髓抗莖山筋抽節金鹽重於素璧玉豉貴於明
珠可以養性消疴還年駐色不藉崔文黃散負局紫丸
翱翔羣鳳風胎雨轂綠翼紅毛素纓翠鬣肅肅毛羽闕
闕好音皆馴狎園池旅食鷄鶩若迺鳩日伺晨響類鐘
鼓鳴蛭候曙聲像琴瑟玄猿薄霧清轉飛猿乘煙咏吟
嘈噴嘹亮悅心娛耳諒所以跨躡管籥韜軼笙簧宅東

起招提寺背巖面壑層軒引景邃宇臨崖博敞間虛納
祥生白左瞻右睇仁智所居故碩德名僧振錫雲萃調
心七覺詆訶五塵郁列戒香浴滋定水至於熏爐夜爇
法鼓旦聞予則跼蹐樞衣躬行頂禮詢道哲人欽和至
教寺東南有道觀亭亭之崖側下望雲雨蕙樓茵榭隱
映林篁飛觀列軒玲瓏烟霧日止却粒之氓歲集神僊
之客餌星髓吸流霞將乃雲衣霓裳乘龍馭鶴觀下有
石井聳峙中澗雕琢刻削頗類人工躍流瀲灩湔涌決

咽電擊雷吼駭目驚魂寺觀之前皆植修竹檀藥蕭瑟
被陵緣阜外則良田區畛通接山泉膏液鬱潤肥腴鄭
白決漳莫之能擬致紅粟流溢鳧雁充厭春艷旨膳碧
鷄冬葷味珍霜鷄穀巾取於丘嶺短褐出自中園蕺蔣
逼側於池湖菅蒯駢填於原隰養給之資生生所用無
不阜實籩簠充牣崖巘歲始年季農隙時閒濁醪初霽
醪清新熟則田家野老提壺共至班荆林下陳罇置酌
酒酣耳熱屢舞誼呶晟論箱庾高談穀稼喁喁謳歌舉

杯相抗人生樂耳此歡豈訾若夫蠶而衣耕而食日出而作日入而息晚食當肉無事為貴不求於世不忤於物莫辨榮辱匪知毀譽浩蕩天地之間心無怵惕之警豈與嵇生齒劍揚子墜閣較其優劣者哉

五洩山水志

明宋濂

五洩山在婺杭越三州境上北距富春南據勾無東接浦陽其山水最號奇峭齊謝玄卿嘗以採藥深入其中而宋刁景純吳處厚亦頗游焉自西坑嶺入過遇龍橋

北行二十步始入西潭前橫一溪水甚寒履之如氷由溪而前徑小潭傍有礁石突起類大甕斜覆乃捫石而登一失足輒墜又行二里所地稍夷曠怪石四瞰峯巒環列獻狀其紋縈縈然類神工鬼斧所雕刻者山多猴遊人恐之輒撒石雨下又前行半里所泉自石竇中出瀏瀏作聲若琴若笙竽泉西流滙為小窪瑩澈泓澄毫髮不隱鯨魚數尾洋洋往來如行琉璃瓶中窪左大樹離立極怪偉倒影入水中如畫又前行五十步大石闊

道相傳有巖角肖鷹喙忽夜大雷雨喙崩下聲聞數十里又行三十步榛篠成林翠光浮映衣袂成碧色山蟲崖虺奔遶後先瞬目失所在至此則氣象陰幽絕不類人世如升蓬嶠坐水晶宮烟火氣消盡又自山腰緣葛而前竹籜覆地厚動足輒仆又過十步許抵小潭小潭上曰西潭水流傾沫成白簾濶可七八尺冉冉下注滑而無聲兩傍石崖峭立苔蝕蘚暈時有水珠毵毵滴下歲旱鄉民禱龍於此水或涌取蜥蜴入瓶中持以歸多

驗自遇龍橋至此約可五六里皆蛇盤磬折路行若窮
又復軒敞其中勝致難得具述或言潭上有石河從石
河至三臺塔人跡罕至莫詳也尋故路而出斜迤而東
過香爐峰峭拔上有石類香爐故名香爐北有峰圓而
童名鉢孟峰或曰肖東甌鴈蕩又名鴈蕩峰自鴈蕩而
南峙有白雪峯屹然人立者名玉女峯嶄嶄勢欲柱天
者名天柱峯其他諸峯星聯肺附登名圖籍者蓋七十
有二焉復從崖東折度畧約橋趨三學士院院唐靈默

禪師道場師嘗降龍於此遺跡尚存由院北深入又百餘步至東潭潭上飛瀑可二十丈瀑怒參倒擊崖竅中若運萬斛雪從天擲下白光閃閃奪人目睛至潭底輒復逆上有聲如輶雷人笑語咫尺不能辨猶聞甕中聲居人云每天風一號四山林木震撼欲折黑雲下罩杳不知昏曉歲旱投龍者多驗如西潭復北折而西泝潭之源登響鐵嶺度紫閭山村人多舍茅葦間有平臯數百畝可耕概傍沿石河又行一里所地名石鼓足頓之

蓼蓼鳴越十步至第一潭潭如井睨之正黑投以小石
鏘若珮環又越十餘步至第二潭圓如錡釜面廣而底
敞大水驅亂石聚其內迨滿復洩去潭下石壁百餘尺
險不可寘足從其右懸藤墜下至第三潭潭甚深以線
縋之下不見底其形方狹而長天向陰常有雲氣從中
起疑有潛龍人恒以幽悄為病第四潭咸不敢往或以
絢圍腰繫巨杙俯崖而瞰潭左右皆楓木其形大概如
第二潭而廣袤倍之側有晉劉龍子墓相傳龍子嘗釣

於潭得驪珠吞之化龍飛去後人為壘石作塚或云龍
子之母塋焉世遠不可辨又其下至第五潭即東潭因
其水五級故名之為洩云噫造物之委形山水者奇峭
有是哉

關中三山志

何景明

終南山在西安府南五十里東自藍田縣界西入咸寧
縣界石鰲谷以谷水出與長安咸寧二縣分界東西四
十里禹貢終南惇物至于鳥鼠詩曰終南何有有條有

梅毛註周之名山終南也春秋左氏傳曰荆山終南九州之險也杜註曰終南在治平武功縣南漢書曰太乙山又為終南山五經要義曰太乙一名終南山在扶風武功縣關中記曰終南一名中南言在天中居都之南也又曰終南太乙左右三十里內名福地三秦記曰太乙在驪山西去長安二百里一名地肺山東方朔傳曰終南山天下之大阻也其山多玉石金銀銅鐵豫樟檀栢異類之物太白山按三秦記曰太白山在武功縣南

去長安二百里不知高幾許俗云武功太白去天三百
周地圖記太白山甚高上常積雪無草木半山有積雪
如瀑布則澍雨人常以為候語曰南山瀑布非朝即暮
水經注曰太白山南連武功諸山最為秀傑冬夏積雪
望之皓然古茂蘇則值亂隱於扶風南太白山中按太
白武功二山在郿縣蓋舊武功縣地也今武功縣本無
此山華山太華之山今在華陰縣西南山海經云華山
之首曰錢來山其形削成而四方其高五千仞廣十里

命曰西嶽又西八十里曰小華山又西八十里曰符禺
山又西六十里曰石脆山又西七十里曰英山又西五
十二里曰竹山又西二百里曰浮山又西百五十里曰
峙山又西百七十里曰南山又西百八十里曰大峙山
又西三百二十里曰嶓冢山又西三百五十里曰天帝
山西南三百八十里曰臯塗山又西百八十里曰黃山
又西二百里曰翠山又西二百五十里曰騄山自錢來
至於騄山二千九百五十七里按華山三峯中一峯東

西二峯鼎峙盤旋峻極不可窮覽何景明曰太華終南
太白實一山延亘不絕太華在華陰終南在長安太白
在郿各望其地異號命爾其山首枕嵩芒尾貫羌蜀表
裏秦關蓋邦域大紀云

吳越行窩志

薛章憲

湖南之衡山在洞庭上其岡巒之軒翔聳拔者凡為峯
七十二金陵之大江在鍾山下其川隄之停蓄演漾者
凡為陂三十六皆古之奇觀蓋山與水交相贊者也故

歷代侈之以誇於四方恒自恨生長遐僻動越數百千里徒心馳目想而已乃者揮手囂煩放情丘壑於吳越之區得勝處二焉在吳曰聚塢去城一舍而遠却負疊障前臨太湖與杭潁爭雄地產楊梅特佳形色味皆曼絕他所傾筐入市人望而知之爭售立盡輒得重貲湖中有山計其數與衡等昔人謂七十二朶青芙蓉是以作草閣臨之馮崖架广高出木末可隱几而指數也因命七十二峯閣在越曰橫裏去城一舍而近衡六里有

奇縱二十里有奇綿亘迤邐多陂澤渠塘平陸纔十之
二居民植藕芡為生收其入反出禾麥上直亦再倍於
平壤夏秋之交彌望皆織文繡段人人刺艇子出入其
間扣舷鼓枻歌呼相答不自意為人間世也築室三楹
茨以生草墜之塗泥命為三十六陂館陂則當不止是
而云然志舊好也歲之日居以課子姓出以事登陟大
率畧相半焉所謂七十二峯與三十六陂者則又平分
之矣蘓長公嘗言山翁不出山溪翁常在溪不如野翁

來往溪山間吾其得而兼之遂自稱浮休野人則自詫
曰吾幸生太平之世身無病心無憂有菽粟以具饗飧
有鷄豚以供伏臘韋布陋矣聊以禦燠寒室廬隘矣聊
以庇風雨行無所牽止無所泥任情率意委順逍遙貴
歟賤歟壽歟夭歟付之造物者一不置肝鬲間也各丐
太僕李公先生題字揭之棟上以告來者使知盛世之
民沐浴膏澤涵煦至化雖野人之愚亦能順時知命處
困而亨鳥雲飛而魚川泳無不遂其生也衡門之木則

咸署曰淳休野人家信有侈心如登龍斷者無以自解
云

文章辨體彙選卷六百二十二

欽定四庫全書

文章辨體彙選卷六百二十三

明 賀復徵 編

志八

永州鐵爐步志

唐柳宗元

江之潯凡舟可縻而上下者曰步永州北郭有步曰鐵爐步余乘舟來居九年往來求其所以為鐵爐者無有問之人曰蓋嘗有鍛鐵者居其人去而爐毀者不知年

矣獨有其號冒而存余曰嘻世固有事去名存而冒焉
若是耶步之人曰子何獨怪是今世有負其姓而立於
天下者曰吾門大他不我敵也問其位與德曰久矣其
先也然而彼猶曰我大世亦曰某氏大其冒於號有以
異於茲步者乎向使有聞茲步之號而不足釜錡錢鏹
刀鉞者懷價而來能有得其欲乎則求位與德於彼其
不可得亦猶是也位存焉而德無有猶不足以大其門
然且樂為之下子胡不怪彼而獨怪於是大者桀冒禹

紂冒湯幽厲冒文武以傲天下由不推知其本而姑大其故號以至於敗為世笑僂斯可以甚懼若求茲步之實而不得釜錡錢鏹刀鉄者則去而之它又何害乎子之警於是末矣余以為古有太史觀民風采民言若是者則有得矣嘉其言可采書以為志

截冠雄雞志

李翱

翱至零口北有畜雞二十二者七其雄十五其雌且飲且啄而又狎乎人翱甚樂之遂掬粟投於地而呼之有

一雄雞人截其冠貌若營羣望我而先來見粟而長鳴
如命其衆雞衆雞聞而曹奔於粟既來而皆惡截冠雄
雞而擊之曳而逐出之已而競還啄其粟日之暮又二
十一其羣棲於楹之梁截冠雄雞又來如慕侶將登於
梁且棲焉而仰望焉而族望焉而小鳴焉而大鳴焉而
延頸喔咿其聲甚悲焉而遂去焉去於庭中直上有木
三十餘尺鼓翅哀鳴飛而棲其樹顛顛異之曰雞禽於
家者也備五德者也其一曰見食命侶義也截冠雄雞

是也彼衆難得非幸其所呼而來耶又奚為既來而共惡所呼者而迫之耶豈不食其利背其惠耶豈不喪其見食命侶之一德耶且何衆棲而不使偶其羣耶或告曰截冠雄雞客雞也予東里鄙夫曰陳氏之雞焉死其雌而陳氏寓之於我羣焉勇且善鬪家之六雄雞勿敢獨較焉是以曹惡之而不與同其食及棲焉夫雖善鬪且勇亦不勝其衆而常孤遊焉然見食未嘗先啄而不長鳴命侶焉彼衆雞雖賴其召既至反逐之昔日亦猶

是焉截冠雄雞雖不見答然而其迹未曾變移焉翱既
間之惘然感而遂傷曰禽鳥微物也其中亦有獨稟精
氣義而介者焉容雞義勇超乎羣羣皆妬而尚不與儔
焉況在人乎哉況在朋友乎哉況在親戚乎哉況在鄉
黨乎哉況在朝廷乎哉由是觀天地間鬼神禽獸萬物
變動情狀其可以逃乎吾心既傷之遂忘之將用斲亨
且可以作鑒於世之人

戕竹志

宋歐陽修

洛最多竹樊圃基錯包籜櫛筍之贏歲尚十數萬緡坐

安厚

一作侯

利寧肯為渭川下然其治水庸任土物簡樸

芟養率須謹嚴家必有小齋閒館在虧蔽間賓欲賞輒
腰輿以入不問辟疆恬無怪讓也以是名其俗為好事
壬申之秋人吏率持鎌斧亡公私誰何且戕且杼不竭
不止守都出令有敢隱一毫為私不與公上急病服王
官為慢齒王民為悖如是累日地榛園禿下亡有晉色
少見於顏間者由是知其民之急上噫古者伐山林納

材葦惟是地物之美必登王府以經於用不供謂之畔
廢不時謂之暴殄今土宇廣斥賦入委壘上益篤儉非
有廣居盛園之侈縣官材用顧不衍溢朽蠹而一有非
常斂取無藝意者營飾像廟過差乎書不云不作無益
害有益又曰君子節用而愛人天子有司所當朝夕謀
慮守官與道不可以忽也類推而廣之則竹事猶末

啞娼志

明楊維禎

啞娼者錢唐娼家女也生無啼聲三閱歲不能言至十

歲終不言笑則啞喙露斷怒則嗑嗑云父母決其啞無疑因呼為木哥且喈曰予門籍娼娼以音為伎今乃啞若是何待乎欲棄之其父曰女雖啞於口勿啞於耳目手足也年及笄天質秀麗中益警穎工織緡能教以琵琶箏篴篴及七盤舞蹈之伎靡不精審富貴家諱所病而求其長輒與他名伎並進既笄貌益揚藝益工京師有大木賈過錢唐聞啞娼名求見即大喜倍凡價聘之左右曰娼以聲取悅啞而倍價以聘何過愚賈笑曰非若

所知也婦類以長舌敗人之家內讒寢而後家可長予
聘無長舌不聘工歌且笑遂挾之歸京師賈侍姬百十
人聞啞娼至皆掩口葫蘆之未幾啞娼寵顯門賈一飲
食非啞娼不甘且私賀曰吾今而後知婦言之不入吾
耳啞娼亦心自語曰不聾啞不婀娜侈然自隆重宴享
非尊右不居服飾非珠珍不御諸姬雖心忌又感得其
不能言皂白於主故又心幸之賈元婦既缺諸姬遂迎
主意推啞婦為繼內數年為賈誕子者三長曰傳嘿次

曰傳訥傳忍後傳嘿以陰重不泄得出入禁中且得美
官啞娼受封號族至今推為婦師云抱遺子曰予聞道
家書有綠霞女以塵心墮世為啞啞娼者亦陰仙之質
非歟然娼以啞病亦以啞遇誠使啞娼才色工之以語
言文章則所遇未必爾借遇亦犯娼求其終榮者寡矣
嗚呼士以語言文章遇主而訖以語言文章為身之讐
孰愈啞娼耶

志血櫃

楊維禎

四溪皆吏某積金若干盛以巨木櫃自喜曰吾櫃可支
吾一世更積若干遺吾妻妻粲然曰金櫃非金櫃乃血
櫃耳吏問故曰棒頭舊血漸新血櫃裏黃金壓白金櫃
金非血乎血溢沈爾軀若何曰沉則吾在金穴矣曰汝
且與金同血又曷取穴吏不悟明年以犯律賊殺籍其
金妻乞櫃貯尸焚之客有弔者呼小吏吏血血湛軀大
吏吏血血標杵鐵吏曰貪吏妻獨賢惜不得姓氏客弔
辭尤警言錄以語虐貪

志殺虎 蘇伯衡

余至高溪之七日有虎夜踰某子甲垣攫其豕豕咿然作聲甲意穿窬也亟舉火燭之不見豕而見虎迹焉黎明與二弟俱躡虎迹覓豕行至黃土隴見兩虎叢薄中呼曰虎在此虎在此鄉黨隣里幸與我共殺之不者不惟吾家被其攫諸公家之豕亦恐不免不惟豕不免害且恐及人於是環高溪一聚壯者操刃與挺弱者聲銅鐵器往助甲虎見衆前且行且咆哮作聲威翼以懼衆

衆不為懼益鼓譟環之虎乃躍而起甲之長弟遽揮挺
摘虎虎怒爪之其右股被創甲之幼弟奮戈刺之自喁
貫脇一虎隨斃其一猶咆哮作噬人狀然聲戰慄僅若
牛鳴衆知其無能也直前刺之於是兩虎俱斃刳其腹
豕固在也虎於毛蟲中最暴戾人聞談虎且猶膽掉畏
之而況敢攫之乎使其據深山大谷雖日攫麋鹿雉兔
以自肥孰得而斃之哉顧恃其暴戾縱逐逐之欲入墟
市攫人畜而弗忌得一豕竟殞其命悲夫世之人自謂

威權足賴而貪欲無顧忌者其亦知所鑒也乎方甲行
覓豕惟二弟從率先衆人刺虎亦惟二弟詩言外禦其
侮必兄弟豈不信矣哉甲喪其豕既而斃兩虎誠若快
意者然為酒食以勞鄉黨隣里費抑夥矣一弟又幾不
脫於虎口持虎皮上送官人莫不謂其得厚賞以其皮
之傷也牽於吏議迄弗之賞然則出死力損家貲以除
暴虐者上功幙府而欲文法吏無吹毛求疵而欲沾賞
典矧可得乎矧可得乎

二研志 祝允明

少宰太原公示客二研允明獲從觀焉其一形中規有柄可提銘以璧海而系之辭魏文靖公遺也一正圓若鏡山人耕土得之以呈公而公自銘者也二石皆良材固當甲品然而材之良不止是獨是著焉以其屬之公也即公之蓄固亦不止是獨是著焉以公嘗取而表之也天下之物之良而繫乎取而表之斯著焉者亦多矣乎夫流發磅礴而異厥鍾者天之氣也凝合以成質粹雜

高下不可以遷者地之宜也隨其稟以效用過則敗害
之而不究者物之材也求之乃獲表之乃貴利器以善
事者人之術也天下之撰則皆若是也夫而豈惟二研
然哉於是亦有以察公之蒞斯世也夫研之遇取而表
也以放之則山龍一人以卷之則袞撻百王此其不負
公者如以辭而已也殆非研之所以望於公而自効者
也非天地之所以生研而屬之公之意也小子敢云

瘞河壩枯骨志

唐順之

髑髏完毀凡若干具其髑髏髀髁脊脅諸雜骨無算蓋出乎犬猪烏鳶所饜飽與夫日炙燹燒風銷水啣之餘而僅有存焉者自癸卯至乙巳東西荐饑流尸順河而下多於河中之船逮水落不能浮屍遂積壘河壩久之維古昔時遇饑饉疾疫則有荒政以聚民其不幸死而暴露則又有掩骼埋胔之令惜哉其不遭乎此時也褚生滔書舍在河壩余與弟正之數往焉每相與散步河壩之上則見泥滓間圜者如破甌擗者如枯株碎者如

沙礫紛然彌望白日照之星星玼玼若尚有光怪余三人者哀其澌滅且盡也命役夫哀而坎焉嗟乎古者塋則旌之以銘旌者別也銘者自名也若曰是其人之骸云爾雖後百千年有得之者亦識之曰是某人之骸云爾古人之於骨骼嚴而別亦不欲其混也若是今乃以五方四裔雜流異業之人而又以殘毀不完之尸爾膊我股甲脊乙脇輳於一坎若藂葦亂蓬然亦重可悲矣余嘗見元人發宋諸陵事火其尸以其餘骨雜牛馬骨

而埋之今此猶尚人骨也嗟乎彼生時何等人也尚不免於牛馬骨同墓況此輩享丐之餘猶得以人骨附人骨復何憾焉使髑髏果有知如莊生之說必且一喙於吾言矣坎之以嘉靖戊申春二月是掩骼埋胔之時也

文章辨體彙選卷六百二十三

欽定四庫全書

文章辨體彙選卷六百二十四

明 賀復徵 編

志九

錦衣志

明王世貞

燕王初起帥師蕩山東度臨邑臨邑書生紀綱叩馬首
請劾王與語悅之綱善騎射頗目法家言便辟應對精
刻詭秘耐逆鉤人意所嚮先發以為績王日益幸愛之

既即位擢綱自忠義衛千戶為都指揮僉事治錦衣親
兵復興治詔獄天子既繇蕃國起以師脅僭大位內不
能毋自疑人人異心有所寄耳目矣綱覘之益布其私
距日夜操切陰計聞上上大以為忠暱之聲咳亡間即
淇成諸公號元勛見則自匿引不敢以身比數而綱小
人也遂驕窮意為非行僚屬指揮莊敬袁江千戶王
謙李春等故無賴曲侍奉綱相緣借奸利數百千端上
久亦頗悟疎之中貴素仇綱者白發其端上令給事御

史廷劾下御史院按驗俱有狀上大怒即日捕誅綱磔於市仍夷三族而令御史院罪狀綱其畧曰謹按故都指揮綱僇薄駟僧陰斂陽卻攬秘蠆尾包藏虺心積稔惡極未易指數按綱前後使腹心幹偽為詔下諸司鹽場勒鹽四百餘萬還復稱詔奪官舶二十艘牛車四百輛載入私第勿予僦人牛立稿又即獄唱持大賈數十百家家索賂不等為黃金三百五十兩白金二千兩鈔四十五萬貫帛千五百疋又挾詐取交趾使黃金八十

兩金盆一異寶二十枚奪民人倪貴等第舍莊宅十七
所計直金三十餘萬匿縣官子民地八所直二十餘萬
從籍故晉王乾沒黃金五百兩金盆一寶釧二白金鞍
轡二又從籍故吳王沒琴瑟御龍服王冠還輒衣故王
冠服坐高坐置酒命優童真保道真吉祥等效伎樂奉
觴上壽呼萬歲徐勞卿等無恙敬舉卿之觴網諸所用
金裝八寶環八寶帽飾玉盞玉水池硯珊瑚犀毗玉束
帶紅鋪床玉石馮几咸飾交龍日月星斗度如乘輿副又

上所怒內侍右班當下綱論棄市者輒將至家具洗沐
好食食之陽為言見上赦若誘取金帛且盡更數日將
至市殺之而先日以行刑報嘗喜道姑陳氏姿首欲買
置媵為都督薛祿所先怨之遇於大內持釵釵祿首腦
裂幾死祿懾不敢言又道恚都指揮伊實特穆爾不避
誣持其冒賞事挫之死綱家蓄養亡命耗山劉等多造
鐵甲弓弩萬計腐取良家子十八以下數百人充左右
役詔選姦好才人既試可令暫出待歲綱輒簿錄其尤

者內之別以次塞莫敢問吳人故大豪沈萬三子文度
萬三生嘗伏法高皇帝籍沒其家所漏貲尚富而文度
頗為人把持其短患之因網舍人匍伏見白進黃金百
兩白金千兩龍紋被一床龍角一株奇寶十具異繒綺
四十疋願得從贄御列為外府外廩歲致梁六百石鈔
二十萬貫醢百石布帛以時進食餌羞果以月進綱許
之仍語文度吾后庭未充若為我吳中徵好者不為數
文度因是挾綱十五而分民間室亡誰何者綱自維威

日重重且迫上冀得所欲當端午上射柳綱私其司射
鎮撫龐瑛曰我故射不中而子折柳鼓噪以觀兵部尚
書御史既射綱謬為不中瑛折柳鼓噪竟射無紕者綱
乃喜詫曰是無能難我矣按綱為天子腹心臣負委任
妄意不軌擢髮不足數罪罪誠當萬死其僚指揮敬江
千戶謙春鎮撫瑛比周為誣罔當死并諸應從坐人以
輕重受條詔曰可頒示天下自紀綱誅終文皇帝世錦
衣衛雖典詔獄畫可領諾而已歆然中消不復能望綱

矣

其二

英宗初理衛事者指揮僉事劉勉指揮使徐恭咸文無害上年少中貴人用事者王振張甚弟山海俱緣振官指揮治錦衣事貴顯矣然俱盛年擁珍重漁色而湛飲多鬪雞擊鞠狗馬之好不事事事頗推繇馬順馬順者亦指揮也以義子事王振見必膝行遽除戚施振甚暱嬖之國子祭酒李時勉有所忤振陰令順行其伐廟木

事囊三木廟門久之始釋有雷震奉天殿鵠吻翰林侍
讀劉球應詔上封事語多侵振振大怒而會編修董璘
言太常用道流不稱請自為卿共祀忤上下獄順榜笞
璘使引球為具藁草即朝班中捽之出球不知所坐款
第曰若吏振死我死即訴上帝耳竟與董璘盆死獄家
人行求屍順故廩之弗得也而順有子年二十餘病孱
久困矣歛起持順髮拳且蹴之曰死老奴今而異日禍
隄我我劉球也順再拜謝罪不可俄而子死中貴人振

以上北伐虜也先陷土木敗聞時郕王監國朝羣臣伏
闕泣請籍振家并誅振弟指揮山海未報衆忿闕無所
泄而馬順前謂衆姑已胥後命給事中王竑直前提梓
順曰是非奸人黨耶衆趣前擊殺順須臾血肉塗起不
可辨矣王恐乃下令誅山海籍中貴人振家因併籍順
畜藏金瑤無算於是理錦衣事者指揮畢旺碌碌循職
而已而英宗之在北營也校尉袁彬始得見袁彬者少
以材力射生選從刺姦緹騎既從征沒虜麾下牧馬矣

久之乃使侍上上方坐橐駝帳中咄咄無所出得彬甚喜彬溫美多計數善言笑時時為隱語悅上獲一羊髀烹而共啖之晝斧薪伐木夜則以背承上足而寢虜挾上攻雲中轉戰上谷遂躡關而下趨京師小不遂輒欲僇殺彬上至為泣請之不得而哈銘者故夷種官為賜姓楊以譯鞬從陷虜頗幸也先間以詆諧解之僅免也先欲使妹尚上上謀之彬曰不可請辭以返國而聘彬嘗病中寒上親為治糜啖之身壓彬背汗洽良已及暮

上還稱太上皇絀彬勞僅拜錦衣百戶太上皇還為皇帝即日召見彬語絮且泣超為都指揮僉事理錦衣事賜城東甲第一區引太液池穿中御溝達之黃金十鎰白金二十鎰綵綺鹽醪醢醬乾餹充實又加賚妻異繒精鏐各有差擢楊銘千戶賜半之間夕宴對畧用家人禮然彬畏滿好避而同列門達遂杲顯達初以錦衣校用文無害理鎮撫司積功次稍遷至指揮而其所任校遂杲繼起與同列上故緣中貴人吉祥及忠國公石亨

復大位德之而二人驕干請不已上心厭之欲稍稍削其重以屬彬固謝不敢乃屬杲杲數伺忠國公罪狀聞上併其從子定遠侯彪誅之上益貴重杲理篆者都指揮王某取充位而已杲遂持吉祥陰擬之急乃與其從子昭武伯欽謀以五鼓從騎就謁杲出見之欽拔刀手斷杲頭攻長安門不下尋就擒詔族吉祥贈杲右都督彬請急不任而門達獨重達佐理衛得兼治鎮撫司鎮撫於錦衣屬也而得專治獄或上有所怒特下與緹騎

賊曹鈎發者俱以委鎮撫獄竟自上請可否毋由錦衣大僚達為人沈敏善計筭所讞恒規上旨而決時上業已誅曹石內惴不自安恒借達為強而達多所陰獻累遷都指揮僉事治鎮撫如故時上最所禮信者李賢達次之每朝而左顧則命賢右顧則命達賞賚無筭而達內害賢寵譖於上曰是嘗受陸瑜金酌尚書者上疑之不召可半歲而袁彬猶以義故位達上達知上薄之構以死罪劾奏上不樂曰是負我者然故人不死足矣此

外以任若達退則執彬下獄脅以火五毒更下彬不勝
苦且誣伏矣而燕中少年楊賢者嘗為漆工尚方奮曰
袁公上魚服侶也門達何人而輒害之因上疏詆達姦
惡數十百事事有指而極稱彬枉且有社稷功不宜罪
詔併下達治達恚撫賢至百餘賢恐遂死不得白謬曰
吾有陰事欲告公達令復輿前前迺夢達耳曰吾小人
何辨為此李學士草耳達大喜趣罷笞出湯沐沐賢醪
肉食之持牘面訴曰李賢令楊賢中臣為袁彬地獨不

畏陛下法乎上曰明於東朝堂辨之東朝堂楊賢度
上已集羣臣出餘肉大呼曰天乎冤哉門指揮醪肉食
我而令引李也李學士貴人吾何從見之且吾死固分
奈何冤他人為也上悟趣出袁彬令分司南都餘俱置
不問然自是達寵漸衰不復寄腹矣居一載驛召袁彬
還職寄如故上崩李賢益重達內不自安出怨望語御
史言之詔執赴法司論成嶺表濱行袁彬帥僚出餞郊
野握手語繾綣已揮囊金為解裝良厚衆咸多彬不念

惡有古長者風彬再遷掌衛事至都督僉事乃卒

其三

孝宗皇帝仁聖委法秋官御史臺廷尉嘗曰與我共天下者三公九卿也以故緹騎逆自斂不敢有所為而其帥如季成李珍趙鑑亦後先逡逡守祿俸而已獨牟斌以指揮領鎮撫有聲斌字益之博學曉文義為儒衣冠其所理恒傳經而法戶部郎李夢陽嘗奏封事言壽寧侯忤旨下獄斌曰郎封事大善即言壽寧胡不指其實

及諸羽翼耶夢陽曰慮置對耳斌曰置對則奚難吾能剪厥羽翼也因傳經牘具上夢陽得不貶正德初劉瑾持中權逐大學士健遷而削尚書韓文等籍而諫臣劉蒞戴銑等數十人後先下詔獄斌輕刑奠居曲為申救御史任諾慤諸僚草奏署其名已實他出不與也斌曰古有恥不與黨人名者公為忠悔耶劉瑾復要斌去奏首權姦事斌不可而顧語同列曰存此諸公臣節庶幾白他日乎宋鄒道原以失先奏被害吾儕何自計為奏

入瑾大怒望斌又偵知其庇言官也矯詔廷杖之垂死
謫戍邊劉瑾誅驛召斌還領鎮撫如故知府劉祥搏其
守閤因相論奏中貴人張雄者納守閤賂陰喝斌令歸
曲祥仍為閤導賂斌不可雄恚挾詐陷之安置武昌感
疾卒斌之再起也長子喪工部循故事官為賻三百金
斌指其存者二子曰吾司刑不道天禍一子懲而受金
行及此矣蓋庫屋敝衣再遭譴怡怡若素云相臺崔銑
記其事盛稱服斌謂直節懿行即名經術士大夫蔑如

也

其四

錢寧者不知何氏少孤鬻中貴人錢能家為養子遂
冒錢寧生而警言敏巧媚異常兒能頗嬖之時鎮滇攜以
往俾主侍應賓客而滇守備盧洪者出入能門下顧見異
其相因大贈遺金帛曰苟富貴無相忘寧跪謝曰君侯
幸厚奴既爾何愧之也洪曰不也若不見衛將軍者侯
乎寧日以重錢氏而會中貴人能死推恩家人寧得受

錦衣百戶上時從諸中貴人微服縱射游獵自稱朱壽
若張公子事者寧始緣馬永成見上於豹房為握槊走
馬手搏諸戲上大悅絕愛幸之賜國姓命為義子俄進
指揮使領衛事諸詔獄緹騎刺姦悉隸屬焉凡所從幸
南海北苑網魚兔射狐豕手猛獸出上谷西之雲中穿
塞直抵延綏徑虜廷而後歸寧又進錢永安亦賜姓官
至右都督寧遷為左都督使事如故遂大煽簸威澤所
顧指諸司毋不惴惴承奉恐後而或意間向背者輒取

中旨行之而盧洪亦用寧力進叅將鎮金齒嘗故勘殺
平人二燬其屍及奪民居財產萬計事發寧以屬御史
唐龍龍不承抵洪罪寧憾之甚未有以中也寧故繇中
貴人進乎中貴人則易之寧見陽為恭謹叩頭稱死罪
上嘗怒中貴人張永欲殺之皇太后為請不能得賓客
居間屬寧寧曰吾力能得之顧諸公居一何魚肉我耳
乃宛轉為上解永果免中貴人則改事事寧矣而諸省
總鎮監鎗督撫貂璫大臣請事者以萬金為薄擲弗顧

然寧所進江彬許泰神周者俱有寵寧獨能以謹身和
柔媚上而已耳不能如彬等武幹又日夜譖傾寧居無
何寧王宸濠反誅事連寧下朝堂按問具狀會肅皇帝
立獄上其畧曰故左都督寧黃緣中人托號義子濁亂
國姓玷污天秩諸所頤使同於山嶽及非受上云何詐
稱得請或口授王綸或手寫御筆前後傳奉大小職官
脅取方鎮郡邑文武金寶瑰異直巨百萬其姻族錢永
安子傑等貫魚驟進翼虎自肥咸辱國姓至都督都指

揮等官故寧庶人宸濠以復護衛請行萬金寧為下兵部允之倒授阿銛故滋叛柄又以按察副使胡世寧條列庶人不法狀庶人恐復行五千金寧捕世寧下獄煉質萬方遞戍遼左上未有太子庶人有子自以疎且非次不當立欲伺上間內入東宮復行五萬金寧陰為契約假以進香取留報庶人金玉帶各二闊裝七寶帶一奇繒綵十為御書加璽詔言上賜庶人大喜列牙受賀令其國僚衣紅四十餘日庶人前後問謝行金約十餘

萬會御史蕭儀發其反謀將置獄者就按石室霄書寧
信旦馳報令先發制人已從中起大事易就庶人反今
連寧寧有危社稷之心罪惡萬狀宜據法磔裂夷三族
亡少長皆殊死詔曰可籍其家黃金可萬斤白金三十
萬斤白玉帶二百五十束獅蠻帶二束祖母珠佛像二
胡椒千五百石他奇珎弓弩器甲名畫稱是斥賣園宅
直三十萬萬計增益縣官二歲賦錢永安等皆從坐誅
寧為人狡陽敬禮士大夫樂施予雖誅人頗有稱惜之

者

其五

代寅者陸炳炳少以力幹稱強敏通書數嘗一登武舉
遂自指揮數遷為左都督或云炳嘗從上幸承天行宮
火炳以宿衛排宮門負上出於焰上心德之不欲顯其
狀故炳事無傳者其官獨驟貴異他人莫測也炳既歿
起代父執衛政其同列皆父黨炳陽為敬事之而徐以
計去其易已者又能得閣臣心以故日益重嘗誅殺兵

馬指揮為御史所繩詔弗問大學士言故愛暱炳炳亦
事之謹甚而亡何御史紉炳亂醢政擅榜禁小錢諸不
法狀言欲從中下捕治炳行三千金解救不得長跪泣
謝罪乃已炳楚士銜大學士言刺骨而會言與其同列
嵩爭寵不勝免炳合謀嵩發言所與邊帥關節書上怒
為誅言大學士嵩更德炳且奇之引與共籌策矣炳所
選用衛士緹騎皆長安中大豪善把持長短者多布耳
目所睚眦無不立碎然其屬小犯法即置之死而炳方

得幸上言無不從夕趨走麾下唯諾者晨拔置同列故其下甚畏炳而慕趨之恐後咸寧侯仇鸞以大同帥入援總天下兵權勢張甚無所不狎侮視大學士嵩蔑如也而獨意憚炳炳亦曲奉之不敢與鈞禮而出重金帛結其所親愛探得鸞陰私鸞病死炳即行其謀反狀族之累加太保兼太子太傅中貴人馬廣領東廠者也李彬司樞密者也其人咸者宿握重自恣炳前後刺其罪下獄死京中外惴惴重足不寒而慄凡豪貲滿萬以下

少酒食過輒收而籍之亡遺者然浮慕義名居之又好
為敬禮士大夫士大夫即上所甚恨下詔獄廷杖緩之
不令死以俟上怒解即貶戍出金錢治道里飲食費不
惜也炳既貴驟得薦紳間聲而又善上所親近者中貴
人司禮錦元相嵩咸與炳結婚姻盤據相重矣上彌益
幸之召入侍西苑直供奉青祠加兼少傅食伯爵奉炳
又益遴緹騎驍勇者七千人別置裨將領之而其所召
募畿輔秦晉齊魯間駢脅超乘跡射之士以千計衛之

人鮮衣怒馬而仰度支者凡十五六萬人大司馬持其籍仰屋歎而已元相嵩既已縱其子攬文武選權而炳從中調停各曹事亡所不關白方鎮督撫大臣非又故而錢通者以八九給事御史自跪門下者亦十之三四炳所畜金珎奇異以巨萬計甲第膏腴擅燕中而其歲出饋遺宰相中貴人亦以萬計時又有朱希孝者領巡捕希孝成國公希忠介弟也用兄任數遷至左都督加太子太保希孝寬然長者不恥為屈得元相驩然炳既

以勢望迫其於元相外相倚而已不能如希孝還往無間也然希孝事炳卑下多避炳以故無意害之嗚呼錦衣一禁校耳其領宿衛則光祿勳也刺姦則司隸也至炳而分將相任極矣一重於紀綱再重於錢寧三重於陸炳其究乃位師保叅綸綍不亦殆哉炳所與共事者都督高恕麥祥黃浦此皆中貴人子弟飾輿服肥酒食宮室苑囿聲色以娛其身如是耳此乃炳所羞接席者何足道哉

星變志

萬曆丁丑十月朔異星見西南歷尾箕而進光芒長亘
天狀若練氣成白虹輦轂洶洶先四日江陵張師相居
正聞父訃翰林當有治喪者吳編修中行趙檢討用賢
皆其所校士往治喪二公者文章行誼雅重於時內閣
馮保挾冲主權重柄於宮闈江陵固交卑事之共計新
鄭元相高拱去一意擅威福專賄賂以諸子為馮之義
兒因占制科鼎甲而自居太師稱政府刑名刻覈其間

羽翼耳目么麼牛馬藉氣力而齟齬人者率多卿省兩
衙門人其幸昵之奴游守禮者橫倨甚睚眦縉紳間俱
以楚濱呼之先是御史劉臺按遼時上疏發江陵之奸
語切直首犯其鋒逮赴詔獄編伍去而疏中實先言其
奪情戀位遺親云其間訃之夜漏已下二鼓而昧爽時
特旨即從中出留之內豎將司禮之命絡繹至附耳躡
踵而江陵時作擎曲狀受意指於二輔臣引奪情例以
聞天語慰勉損貶殊至蓋曠古異典祇在聞訃之一二

頃謂非密畫夙構者耶迺初辭疏中云守制是常禮小節且云有非常之人然後有非常之事又一二日即平章幾務於苦塊中辭疏僅至再忽自請留京守制以次馳驛回籍營喪事時編修吳中行遂稱疾杜門而檢討趙用賢則與沈修撰懋學時時過學士王公錫爵所慷慨歎歎曰波流瀾狂砥之障之豈無其人乎臺省諸諫官望頤承旨聯名乞留疏既上而位九列者復四出囑其長為倡以效之士大夫咸垂口結舌噤不敢出一語

翰林二公觸目激衷各有伏闕上書之思而各不相聞
問也草數具謂史臣無言責姑俟有先發者足以明大
倫伸正義足矣至十六日檢討過編修所抵掌談時事
詞意激昂殊勃勃因微洩王學士痛憤語次述沈修撰
貽書李司徒幼滋云師相之歸宜決臺省之留宜寢李
蓋為江陵周親所雅善者李答書以沈所言宋頭巾語
此宋之所以終不競也今師相不奔喪是聖賢之道直接
揖遜征誅而得其傳者本朝惟新建可與言羅生正不

達此耳又次日沈修撰私相語曰臺省有疏則臺省無言矣翰林風化之原繼文毅而起者誰歟編修遂出袖中草示檢討讀之扼腕拊膺芒芒然策馬歸亟草疏矣是日編修叩關王廟曰欲有敷陳諸無顧惜第吾有母老矣猶得餘生返故園乎若奪官貶秩甘如飴也沈修撰從檢討所聞之亟過編修為覓寫本者沈復謀之王學士學士又亟過編修學士曰三綱淪九法斁舉國若狂矣士氣摧阻世道陵夷至此哉索疏草讀曰此所謂

笑嘻之怒甚於嫚罵者君能置死生乎不能則不可為也編修頷之曰齋心舉念時業已辦此矣學士淚潛潛承睫而別十八日編修書首上即過江陵所投揭帖揭帖入久之傳語曰這本不要上編修曰業已上傳語曰既上復何言回家候旨耳編修曰這本替老爺陳乞恐朝廷怒耳豈意老爺怒左右但作挪揄狀編修復過王學士馬宗伯各投以揭帖學士院長宗伯館師也學士業已聞第曰代為籌之恐不止於無官當有罪矣宗伯

歸薄暮亟索燈讀之拊掌擊節曰本院生光吾黨負愧
我與典禮之宗不忍嘖嘖特以地位相逼為嫌耳遣侍
吏入記室取陳左都瓚刺來刺云師相之事公卿宜乞
留宗伯亟倡之疏上慎勿遺我名時左都春秋高病甚
請休沐已久宗伯書刺尾云嗟乎此老之病必不起矣
以其心之先死也素以硜硜著聲今若此古稱蓋棺論
定信哉因顧編修曰我之情見乎辭矣十九日趙檢討
之疏上二十日編修偕檢討同赴闕候罪二疏俱留中

不發消息幾微掖庭掃除輩有縮頸吐舌者時以星變
火災建醮停刑又知必有繼起者故稍待也師相之怒
甚盛招劉榜眼瑛入幕語之曰吳子者我極愛之且有
厚望望其為伊周何乃做一個羅一峰便了他一生羅
一峯有甚好處要學他繼之者趙子二子將座主先生
立名可乎昔又有劉臺者是誰瞎眼取這等門生語多
悖謬而劉榜眼者因承命過編修條詰之謂若好名不
宜以座主為餌編修應曰不獨我好名亦欲以好名成

師相忠孝之節正所以報座主座主之名完則門生之名不得成矣師相豈以刑威殺戮足以鉗懾人人固有視死生如旦晝者榜眼復之江陵所返命而怒愈甚王學士會翰林自宗伯而下數十人求解於江陵江陵拒不接而王學士獨徑造於喪次曰本衙門兩生狂妄望老先生務宥江陵云疏留中我不得預聞聖怒不可測學士曰即聖怒亦為老先生而怒語未訖江陵忽屈膝於地舉手索笏作刎頸狀曰你來殺我你來殺我學士

大駭異遂趨出乃知事不可回矣學士遇劉榜眼於門
厲色峻語曰若與吳趙二君素有隙當此危急非若落
石加膏時也今日之事在足下二十一日二公席藁俟
於東長安朝房而秦中書柱者編修以身後事為托者
也不侵為然諾改服挾醫周旋於二公甚力而不匿聲
跡竟見坐為黨至削籍云二公者相對竟日舉酒酌忻
忻也兵番漸已圍宿而江陵家僕隸變衣裝伺察者旁
午道路以目迨晡矣復聞有兩刑曹者為員外郎艾君

穆主事沈君思孝二君則共上一疏也沈主事與檢討
交因過之出其疏語多訛訐編修則曰事激矣吾輩當
無復生理蓋語愈傷怒愈盛而罪不重恐言不止也江
陵亦彷徨遣飛騎走卒伺探諸曹中稍涉形影亟囑其
所私客慰諭以阻之徐爵游守禮往來密勿者數十番
而謀始決旨屢易屢重兩夜徵傳四人者皆杖戍編修
與檢討席地卧各以一兒子侍第曰事屬綱常言傳簡
冊吾得死所矣是日都人集長安道者千萬雖販夫庸

子願望見忠臣羊采朝房陋不能容至壞楹毀檻入矣
晴煦中陰雲陡結天鼓大鳴慘黯失光者移時而校尉
數十出如捕虎捕梟就逮時以繩榜腕以鐵鋪繫兩中
指指須臾黑漲不可忍前押後擁先兩翰林而兩刑曹
隨之兩翰林舉酒盡一卮顧戚友輩曰吾事畢矣復顧
兒子曰吾死不懼亦不悔無它言空囊懸罄只以十金
買一棺殮我蓋稱家之有無亦明我之有罪也辭色從
容笑而入每入一門門即合正如世所云陰府地獄者

兩刑部微有諍言語謂吾輩為天倫民彝耳原不得罪名教亦不得罪朝廷旁有中貴人私相詫曰朝廷且不知也四公言廷杖時周廬環列羽林軍戈戟森嚴廷中杖如麻執杖者如林佇司禮乃出綰銅符者服虎章者趨蹌於其間大喝帶上犯人來自此後每一喝則千百輩一喊聲以應其震撼若天地崩裂者二翰林同受杖而二刑部繼之先喝跪下宣駕帖宣訖喝拏下倏忽遂縛定喝打棍的喝着實打六十棍喝五棍一換喝着實

打一校尉乃執棍出班立喝閣上棍乃閣棍於股上喝
打乃始打至三棍則止又喝着實打至五棍則又止一
校尉復執棍出班立其喝其喊應俱如前五棍時蓋六
十棍凡十二人喝閣上棍喝打凡十二聲而着實打之
喝則二十至此則世所稱陰府地獄恐無此光景初如
泰山壓卵糜潰而不勝也又如熱油灌肌焚灼而難禁
也既而體膚若非我所有者至周三四其痛苦更追心
刺骨愈多則愈不堪思以不速斃為憾惟氣定志寧神


不亂故魄不搖司禮睜目解頤杖畢報棍完喝採下去
四校尉以布袱曳之出至長安則以板闥舁之行赴戶
部又赴京兆赴縣馳頓自己至酉三十里而道路嗟吁
追隨擁塞不得行檢討差強忍進粥一二箸編修瞶眩
去亟投藥一丸昏黑出都門始醒而息猶奄奄微也謂
其時神魂遊蕩颼颼若無所棲泊耳中數數聞神人語
云此天地間正氣天地間正氣豈冥冥中果有默佑陰
陽者耶二刑部則加鐐鎖且禁獄中三日始僉解發成

更辛苦也講讀趙志臯張位于慎行張一桂李長春田
一雋修撰習孔教暨沈懋學俱有援掇之奏格不入而
鄒進士元標則懷其疏俟於廷見四公受杖旁觀發憤
切齒頓足俟杖畢上疏編修僦寓都門外有公卿走慰
勞者邏卒飛騎一一籍記之而廠衛之命至僅二日裹
創徒去鄒公復杖於廷如二刑部矣中書策馬隨編修
三十里而暝投宣靈廟宿焉又明日抵灣檢討僦寓稍
遠亦以是日驅之去妻子流離行李零落病次旅棲寒

燈破壁形影相弔至洛河偶遇故人徽賈張文憲邂逅
風塵頗為周旋居三日而厭衛之迫逐猶不已也都中
且有榜帖揭之通衢云科道羣狐搖尾翰林雙鳳鳴陽
又云居正身不正用賢相不賢思孝心何死中行道始
全蓄艾能醫病元標欲轉天五賢一不肖千載定須傳
而師相已襲冠裳於衰經登朝辦事出朝房見客矣又
未幾衣紵懸玉於吉典矣南京六卿暨六科復羣奏乞
留潘尚書晟呂太常霍傳給事作舟王給事蔚張御史

一鯤林御史應訓為之倡獨僉都御史張公岳疏請師相奔喪而全大節御史諸公鴻謨疏乞宥狂愚諸臣而沈修撰懋學貽書方司馬司馬時攝冢宰事計吏將有所中傷也又三貽書江陵冢子伸經權忠孝之辨長牘娓娓殊激切中所甚諱者內侍中涓稍稍傳宮闈語思中外結約必欲爾甚不得已云而江陵計畫亦勞鬚鬢頗改焉二刑部暨鄒公諸就道而二翰林猶得在床褥剗去肉數十鬻大盈尺深入者餘寸竟空一股云王學

士沈修撰秦中書掛冠而往至是異星滅



文章辨體彙選卷六百二十四